

आकाशवाणी

खबरां ---

1 भारतीय जनता पार्टी नै अरूणाचल प्रदेश विधानसभा चुनाव जिती लैते न ते राज्य च सत्ता बरकरार रक्खी ऐ। सिक्किम च होए दे विधानसभा चुनाव च सिक्किम क्रांतिकारी मोर्चा नै इक तरफा जित्त हासिल कीती ऐ।

2. प्रधानमंत्री नरेंद्र मोदी होर देश च गर्मी दी लैहर ते चक्रवाती तूफान मगरा बनी दी स्थिति दी समीक्षा आस्ते 7 मीटिंगा करा'रदे न।

3 भारत नै क्यूबा गी मनुक्खी आधार पर सहायता भेजी ऐ जेदे च भारत च बनी दी 90 टन दवाई सामग्री शामिल ऐ।

4 मौसम विभाग मुजब अगले 3-4 दिन पूर्वोत्तर ते दक्षिणी प्रायद्वीपीय भारत च भारी बरखा बरोग।

5 आई.सी.सी टी-20 विश्व कप क्रिकेट च अज्ज मेजबान वेस्ट इंडीज़ दा मुकाबला पपुआ न्यू गिनी कन्ने गयाणा दे प्रोविडेंस स्टेडियम च होग।



Final-AR

अरूणाचल प्रदेश ते सिक्किम च विधानसभा चुनाएं दी मतगणना दे सब्बै नतीजे थहोई गे न। अरूणाचल प्रदेश च भारतीय जनता पार्टी नै सत्ता बरकरार रक्खी ऐ जिल्ले के सिक्किम च सत्ताधारी सिक्किम क्रांतिकारी मोर्चा दी इक्क तरफा जित्त होई ऐ। पूर्वोत्तर दे इनें दौनें राज्यें च विधानसभा चुनाएं दे वोटें दी अज्ज गिनतरी कीती गेई। अरूणाचल प्रदेश दिएं 60 ते सिक्किम दिएं 32 विधानसभा सीटें लेई लोकसभा चुनाएं दे पैहले चरणें च 19 अप्रैल गी कनोकन्नी वोट पाए गए हे। अरूणाचल प्रदेश च पैहले गै भाजपा नै राज्य विधानसभा चुनाएं च 10 सीटें पर बिजन विरोध दे जित्त दर्ज करी लैती ही ते बाकी दिर्यें 50एं सीटें चा भाजपा नै 36 सीटां अपने नां कीतियां। नेशनल पीपल्स पार्टी नै 5, नेशनलिस्ट कांग्रेस पार्टी ते आजाद मेदवारें 3-3, पीपल्स पार्टी ऑफ अरूणाचल प्रदेश नै 2 जिल्ले भारतीय राश्ट्री कांग्रेस नै 1 सीट पर जित्त दर्ज कीती ऐ। तोआई सिक्किम च सब्बै 32 सीटें दे घोषित नतीजें च सिक्किम क्रांतिकारी मोर्चा एस.के.एम नै 31 सीटां जितियां न। सिक्किम डेमोक्रेटिक फ्रंट एस.डी.एफ शड़ा इक्क सीट जित्तने च कामयाब रेया।



LS –Exit Poll

4 जून गी लोकसभा चुनाएं दी मतगणना शा पैहले निजी टीवी चैनलें ते होर दुइएँ अजेंसिएँ चुनां परेंत दे सर्वे दे नतीजे जारी कीते न। मते सारे एग्जिट पोल शारा देआ करदे न जे भाजपा दी नुमायंदगी आहला राश्ट्रीय जनतांत्रिक गठबंधन एनडीए लोकसभा चुनाएं च दसता बरकरार रखने लेई तैयार ऐ। एग्जिट पोल दस करदा ऐ जे एनडीए 543 मिम्बरी लोकसभा च दो तिहाई बहुमत हासल करी सकदा ऐ जेड़ा 272 सीटें आहली बहुमत सीमा गी पार करी जाग। इनें लोकसभा चुनाएं च भाजपा दी नुमायंदगी आहले एनडीए ते कांग्रेस दी नुमायंदगी आहले आई.एन.डी.आई गठबंधन बश्कार सिद्धा मुकाबला हा। सत्ताधारी भाजपा गी प्रधानमंत्री नरेंद्र मोदी हुंदी अगुवाई च उप्परोतली त्री बारी सत्ता च औने दी मेद ऐ। एग्जिट पोल च जम्मू-कश्मीर च नेशनल कांफ्रेंस गी 3 ते बीजेपी गी दो सीटां मिलने दा अंदाजा ऐ।



Congress-Exit Poll

तोआई कांग्रेस नै बक्ख-बक्ख निजी टी.वी चैनलें ते दुई एजेंसिएँ आस्सेआ कल जारी कीते गेदे एग्जिट पोलस दे आंकड़ें गी खारिज

कीता ऐ। सीनियर कांग्रेस नेता जयराम रमेश हौरें एग्जिट पोल्स गी पूरी चाल्लीं झूठा करार दिता ऐ। उनें दावा कीता जे आई.एन.डी.आई गठबंधन घट्ट शा घट्ट 295 सीटां जित्तोग।

<><><><><><><>

PM-Heatwave Meet

प्रधानमंत्री हौरें अज्ज इक मीटिंग सददिए देश च गर्मी दी लैहर कन्नै बनी दी स्थिति दा जायजा लैता। प्रधानमंत्री हौरें गी मीटिंग च दस्सेया गेआ जे मौसम विभाग दे अनुमानें मुजब राजस्थान, गुजरात ते मध्य प्रदेश दे हिस्सें च गर्मी दी लैहर अजें जारी रौहग। इस बरे मानसून, देश दे मते सारे हिस्सें च सामान्य या सामान्य शा बद्द रौहग ते समुंद्र कन्नै लगदे इलाके च सामान्य शा घट्ट होग। प्रधानमंत्री हौरें अग्ग लग्गने दी घटनाएं कन्नै निब्बड़ने ते इंदी रोकथाम आस्तै लोड़चदे उपा करने ते लगातार अभ्यास करने दे निर्देश दित्ते। प्रधानमंत्री हौरें जंगलात च फायर लाइन्स दी मुरम्मत ते अग्ग पर रोकथाम दे उपाएं पर जोर पाया। मीटिंग च जंगलात च अग्ग लग्गने दी फौरम निशानदेही च उपयोगी पोर्टल वन अग्नि बारै बी प्रधानमंत्री हौरें गी दस्सेया गेआ।

इस सहायता कन्नै भारत दी दुनिया दी फार्मसी होने दी भूमिका पक्की हुंदी ऐ ते भारत ते क्यूबा दे रिश्ते गी बी मजबूती थोंदी ऐ।

<><><><><><><>

Weather

मौसम विभाग नै आखेआ ऐ जे दिल्ली सने पश्चिमोत्तर भारत च सख्त गर्मी च कमी आवा करदी ऐ पर पश्चिमोत्तर ते मध्य भारत दे किश हिस्सें ते ओडिशा च सख्त गर्मी आहला मौसम बने दा रौहग। वरिष्ठ मौसम वैज्ञानिक आर.के जेनामणि होरें आकाशवाणी गी दस्सेया जे पश्चिमी हवाएं करी दिल्ली सने पश्चिमोत्तर भारत च तापमान च गिरावट आंग। मौसम विभाग नै इनें इलाकें दे किश हिस्सें च 4 थमां 6 जून बश्कार गरज ते चमक कन्नै हौली बरखा बरने दी भविक्खवाणी कीती ऐ। अगले 3-4 दिनें तगर देसै दे पूर्वोत्तर हिस्से ते दक्खनी तटवर्ती इलाकें च तेज बरखा दा अनुमान ऐ।

<><><><><><><>

Amarnath-Yatra

आँदी श्री अमरनाथ जी दी जातरा दी तयारिएं दा जायजा लैने लेई उधमपुर दियां डिप्टी कमिशनर सलोनी राय होरें इक बैठक लाई।

बैठक दौरान बक्ख-बक्ख मैहकमें दे अफसर ते होर दुए नुमाइंदे मौजूद हे। इस दौरान यात्रा दी तयारिएं बारै जिंदे च रौहना, बौहना, बिजली, आरजी शौचालय, साफ-सफाई, यातायात प्रबंधन, सुरक्षा बंदोबस, नियंत्रण कक्ष, चीजें-बस्तें दी कीमतें दी जांच, तालमेल सरबन्धी कमेटियां, आपात स्थिति कन्नै निब्वइने ते होरनें दुइएं चीजें दा जायजा लैता गेआ। डिप्टी कमिशनर होरें सारें प्रतिभागिएं पर जोर पाया जे ओह पूरे उत्साह कन्नै कम्म करन ते आपूं चै नेइमां तालमेल बनान तां जे यात्रा गी सुचारू ढंगै सिर करोआना यकीनी बनाया जाई सकै।

<><><><><><>

Mata Vaishno Devi

जम्मू प्रांता दी त्रिकुटा पहाड़िएं च स्थित माता वैष्णो देवी दी पवित्र गुफा च इस बरे 31 मई तगर 40 लक्ख शा बद्द तीर्थ यात्रुएं त्रिकुटा पहाड़ियें च स्थित माता वैष्णो देवी दे पवित्र गुफा च दर्शन लेई पुज्जे। 31 मइ तगर 40 लक्ख 30 जहार 927 भक्तें मंदर च माता दे दर्शन कीते जेड़े पिछले 5 बरें दे मुकाबले च अपने आप च रिकार्ड ऐ। जंदे बरे इस्से अवधि च यात्रा करने आहलें दी गिनतरी 38 लक्ख 47 जहार 584 ही। अधिकारियें दस्सेया जे माता वैष्णो देवी मंदर मुख धार्मिक सैलसफें आहिलियें थाहरें च इक्क ऐ जेड़ा देस विदेश थमां

यात्रुएं गी अपनी बक्खी आकर्षित करदा ऐ। अफसरें दस्सेया जे हर ध्याड़े कटड़ा बेस कैंप पुज्जने आहलें दी गिनतरी 40 जहार होई गई ऐ।



Cricket

आई.सी.सी 20-20 विश्व कप क्रिकेट दे अज्ज खेड्ढे गेदे पैहले मैच इच अमरीका नै कनाडा गी 7 विकटें कन्नै हराया। कनाडा नै पैहले बल्लेबाजी करदे होई 20एं ओवरें च 5 विकटें दे नुकसान पर 194 रन बनाए। अमरीका नै दो ओवर बाकी रौहंदे इस लक्ष्य गी हासिल करी लैता। अमरीका पास्सेया आरोन जोन्स ते एन्ड्रोज गौस नै शानदार पारियां खेड्ढियां, टी-20 विश्वकप दी मेजबानी अमरीका ते वेस्टइंडीज सांझे तौर पर करा करदे न। अज्ज मेजबान वेस्ट इंडीज़ दा मुकाबला पपुआ न्यू गिनी कन्नै गयाना दे प्रोविडेंस स्टेडियम च होआ रदा ऐ। एह मैच भारतीय समें मुजब संझा 8 बजे शुरू होग।

